



Inatsisartunut ilaasortaq,  
Adam Kristensen,  
Inuit Ataqtigiit  
Maani/

**Kangersuatsiami tunitsivik pillugu § 37 naapertorlugu apeqquummut nr.  
109\_2024-imut akissut**

Ulloq: 17-06-2024  
Suliap normua: 2024 - 10918  
All. nr. 24213206

Inatsisartut Suleriaasianni § 37, imm. 1 naapertorlugu Kangersuatsiami tunitsivik pillugu Naalakkersuisunut apeqquteqarputit. Apeqqut suliaasaqarfigisannit akineqartussangorlugu innersuunneqarnikuuvoq.

Postboks 269  
3900 Nuuk  
Oqarasuaat (+299) 34 50 00  
Fax (+299) 34 63 55  
E-maili: apn@nanoq.gl  
www.naalakkersuisut.gl

**1. Kangersuatsiami tunitsiviup 2025-mi ammaqinneqarsinnaanissaa siunertaralugu Royal Greenland-mit pisiarineqarnissaa Naalakkersuisut aqquitsiussinnaavaat?**

**1-imut)** Apeqqutitit akissutissaqartissinnaajumallugit Royal Greenland A/S-imut saaffiginnippunga. Royal Greenlandimit ilisimatitsissutigineqarpoq Kangersuatsiami tunitsivik 2015-imi namminersortumut Hans Mathiassenimut 1 kr.-ilersillugu tunineqarsimasoq. Ilutigisaanik Savissivimmi tunitsivik Hans Mathiassenimit aamma 1 kr.-ilerlugu pisiarineqarsimavoq.

Tunisinerup atatillugu ukiuni qulini tulliuuttuni tunitsivimmut qaleralinnik tunisisoqannginnissaa piunasaqaatigineqarsimavoq, Royal Greenlandilu tunitsivimmik 1. kr.-ilersillugu tunisaqaraangami nalinginnaasumik taamatut piunasaqartarpoq. Taamaattumik tunitsiviup matoqqatinneqarnissaa piunasaqaataasimangilaq. Kangersuatsiap eqqaata saarulleqarluarnini ilisarnaatigaa, tunitsivillu tunineqarmat pisisup taavani saarullittarineqartunik tunitsivimmik atuinissaa Royal Greenlandimit isumaqarfigineqarsimagaluarpoq.

Tunitsivik tunisinerup nalaani aserfallassimaqaaq ukiunilu arlalinni ingerlatsivigineqarsimanani. Kangersuatsiami tunitsiviup 2011-p kingorna atorneqarsimanginnera KANUAANA-mit uppersarneqarpoq. Ukiut qulingiluat atorneqanngereerluni tunitsiviup pitsanngorsarneqarsimanissaa Royal Greenlandimit ilimagineqanngilaq.

Taamaattumik Royal Greenland isumaqarpoq tunitsiviup nunaqarfimmut sanilliullugu pitsaanngitsumik inissisimanera aserfallassimaneralu pissutigalugit Kangersuatsiami tunitsiveqarnikkut pissutsit aqqinneqassappata pitsaanagerusumik inissisimasumik nutaamik tunitsiviliorinissaaq aqquatsiatuaasoq. Tamatuma saniatigut imeqarniarneq kallerup inneranullu tunngasut pitsanngortinneqarsimanersut misissugassaassaaq, tunitsivimmi Royal Greenlandimit kingullermik atorneqarmat imissaaleqineq pissutigalugu imaq atorneqartariaqartarsimammat.

Kangersuatsiami tunitsiviup utertillugu pisiarinissaanik nutaamilluunniit tunitsiviliorinissamik Royal Greenland A/S massakkuugallartoq pilersaaruteqanngilaq. Aamma qanorluunniit pisoqaraluarpat 2025-imi tunisisoqarsinnaalertoqarnaviannngilaq.

**2. Kangersuatsiami tunitsivik Royal Greenland-imit pisiarinqassappat nunaqqatigiinnit tingujartuarneqarnissaanut Royal Greenland Naalackersuisullu aqutitsiuussisinnaappat?**

**2-mut)** Tunitsivik pillugu Royal Greenland A/S-imit paasissutissiissutigineqartut aallaavigalugit tunitsivik Kangersuatsiami innuttaasunit figuneqarusussappat massakut piginnittuusup attavigineqarnissaa Naalackersuisunit kaammattuutigineqarpoq. Innuttaasut tunitsivimmik pilersitsinermut attuumassuteqartunik Aalisarnermut Piniarnermullu Naalackersuisoqarfimmit aammalu sullissivik.gl aqutigalugu ilitsersuutinik pissarsisinnaapput.

Inussiarnersumik inuulluaqqusillunga



Kim Kielsen  
Aalisarnermut Piniarnermullu Naalackersuisoq